

## PUKKE!

Vir u kleurbaadjies en sportbenodigdhede:

**Johan Claassen Broers**

# die

IN U LIG SIEN ONS DIE LIG

# WAPAD

AMPTELIKE STUDENTEKOERANT VAN DIE P.U. vir C.H.O.



**CACHET APTEEK**

U Plus Apteek  
**TOMSTRAAT 92**  
**Tel. 4201**  
Groot genoeg om u te dien, klein genoeg om u te ken

JAARGANG XXXV

NOMMER 19

26 SEPTEMBER 1980

## Lentefees met rugbydis

DIE jaarlikse Lentefees vind op Maandag 29 September om 16h30 op die Fanie du Toit-sportterrein plaas.

Die hoofdis op die program is 'n uitdaag-rugbywedstryd tussen Caput en die kampioenkoshuis van Tukkie om 16h30 op die A-veld.

Die res van die program sal uit die volgende kompetisies bestaan:

Twee kandidate uit elke manskoshuis sal deelneem aan 'n mnr Pukbaard-kompetisie wat beoordeel sal word deur die primarii van die dameskoshuise. Toutrekspanne van mans- en dameskoshuise sal ook hulle sweet gaan sweet. Dames sal grenspakkies maak om aan die Weermag te oorhandig.

Daar sal geen kos by die koshuise se eet-sale beskikbaar wees nie, maar die spyskaart by die massa-ete sal bestaan uit vleis, wors, brood, lemoensap en melk. Daar sal ook bier beskikbaar wees.

## Eksamen inskrywings

ALLE eksameninskrywings is nog nie afgehandel nie. Baie studente het nie voor 12 September ingeskryf nie. 'n Boete van dertig rand sal teen studente gehêf word wat nie voor die genoemde datum ingeskryf het nie. Die finale datum vir inskrywings is 26 September.

## Klasgeld

Die Raad van die Universiteit het verhoging van die klasgeld vir 1981 oorweeg en aan die Dagbestuur van die Raad opgedra om 'n finale besluit oor klasgeld op gedifferensieerde basis te neem.

Besonderhede oor die klasgeld vir 1981 sal later beskikbaar gestel word.

## Lenings

DIE sluitingsdatum vir aansoeke van universiteitsbeheerde lenings en beurse is 30 September. Laataansoeke sal op meriete beoordeel word. Dit sluit nie merieteprestasiebeurse in nie.

# Rektor het nie ingemeng Rusverstoring oorsaak vir dansverbod

— Petro Malan —

DAAR is gerugte op die kampus dat die rektor, prof Tjaart van der Walt, die eienaars van die Mothsaal gevra het om georganiseerde danse deur die studente te verbied. Die rektor sê egter dat die eienaars self besluit het om dit te verbied, nadat daar klagtes oor openbare rusverstoring was.

Die organiseerders van die dans, wat nie hulle name genoem wil hê nie, sê hulle verkwalik die biertuin wat tydens die "Groot Brag" gehou is. Daar is nie kontrole uitgeoefen nie en drank is misbruik.

Studente wat onder die invloed van drank was het by die dans opgedaag. Die probleme het begin nadat die verkeerspolisie om 23h30 kaartjies uitgeskryf het aan studente wat onwettig parkeer het.

Die organiseerders sê daar was voorheen geen klagtes oor die danse nie. Hulle is deur die eienaars gelukkigens oor die ordelike wat daar geheers het. Daar

was ook geen klagtes oor 'n dans wat 'n week later in die Mothsaal gehou is nie.

Prof Tjaart van der Walt sê dit is die eienaars se goeie reg om tot so 'n besluit oor te gaan. Hy plaas geen verbod op dans buite die kampus nie, mits die studente hulle gedra.

Hy sê die studentemassa lei weer eens onder 'n paar rusverstoorders. Organiseerders moet self die skuldiges vasvat, want dit dra 'n swak beeld van die PU uit.

Die polisiehoof het aan die Rektor gesê dat hy teen rusverstoorders gaan optree. Dieselfde reël geld ook by hotelle waar soortgelyke rusverstoring voorkom.

Die menings van 'n paar studente is ingewin:

SAKKIE VAN ZYL, LLB II-student, se mening is dat dans in die Mothsaal moet voortgaan omdat dit goeie ontspanning bied aan die studente. Die mees geslaagde danse is hier gehou en studente het hulle nog altyd goed gedra. Dis ook buite die kampus en hy beskou dit nie as oortreding van die reëls nie.

SAKKIE VAN ZYL, LLB II-student, se mening is dat dans in die Mothsaal moet voortgaan omdat dit goeie ontspanning bied aan die studente. Die mees geslaagde danse is hier gehou en studente het hulle nog altyd goed gedra. Dis ook buite die kampus en hy beskou dit nie as oortreding van die reëls nie.

HENNIE BEZUIDENHOUT, 'n BA II-student sê dit was tot dusver die enigste ordentlike plek vir die studente om te gaan dans. Ander plekke wat danse aanbied is die disco's en hotelle waar drankmisbruik aan die orde van die dag is. Sommige hotelle bied soms goedgeorganiseerde danse aan, maar dit is baie min en kan dus nie in die studente se behoeftes voorsien nie.

JAN VAN DER WALT, SSR-lid vir ontspanning, sê dit is die eienaars se reg om oor hulle eiendom te besluit. Die probleem van ontspanning geniet op die oomblik aandag. Daar word gepoog om in die plek van dans buite die kampus, ontspanning op die kampus te kry.

## Personeel in botsing betrokke



● Die PU het 'n skenking van R3 000,00 van Sharp Electronics gekry om koshuisrugby te verbeter. Sharp Electronics se voorsitter, mnr Colly Fran oorhandig hier die tjek van R3 000,00 aan die rektor, prof Tjaart van der Walt, terwyl prof Willem Scott toekyk. (Sien berig op bladsy 8)

'n GROEP van veertien dosente van die Departement Biblioteekkunde was die afgelepe naweek in 'n botsing op pad na 'n SAIBI-konferensie in Kaapstad betrokke.

Die ongeluk het naby Joubertina gebeur toe 'n Volkswagen met twee insittendes buite beheer geraak het en teen die bus gebots het. Die insittendes, twee Kleurlinge, is op slag dood.

Die bussie waarmee die dosente gereis het, het omgeslaan en is onherstelbaar beskadig. Niemand is ernstig beseer nie en 'n bus van Kaapstad het die groep op George ontmoet, waarvandaan hulle na Kaapstad is om die weeklange konferensie by te woon.

## AWB bedrywig op kampus

MNR EUGENE Terre Blanch, leier van die AWB (Afrikaner Weerstandsbeweging), het op uitnodiging die koshuisgangers toegesprek en inligting oor die Beweging aan hulle verskaf. Die vergadering het op Dinsdag 16 September plaasgevind.

Die aanbieders het die vergadering sonder medewete van die SSR gereël. Die Studenteraad verwelkom sulke inisiatief, maar betreur dit dat die regte prosedure nie gevolg is nie.

Mnr Terre Blanch het op die vergadering genoem dat hy by die SSR gaan aansoek doen vir funksioneringsreg vir die AWB op die PU-kampus.

In die lig hiervan het die SSR dit goedgedink om tydens 'n Kontakpolitiek vergadering aan die AWB 'n geleentheid te gee om hulle saak te stel. Dit sal nie 'n geslote vergadering tussen die SSR en die AWB wees nie.

## Vasvraprogram nie op TV Pukke vaar goed

Die Pukke het besonder goed vertoon in die TV-vasvraprogram "Waar is ons?" wat vroeg in Augustus in Johannesburg opgeneem is, maar nooit gebeeldsaai is nie.

So sê Gert Coetzer, sekretaris van die vorige studenteraad wat die organisasie daarvan behartig het. Volgens hom het die Pukke "baie goed gevaar en goed gereageer in vergelyking met die RAU-span."

Die Pukke, Deon Meyer van Hombré en Helen van Coller van Kasteel, albei derdejaar geskiedenisstudente, het van die eerste vraag af goed gevaar en uiteindelik met 61 teenoor 23 gewen. Hulle het

ook al die pryse ingepalm.

In die gehoor was daar minder as tien RAU-studente en meer as vyftig van die PU. Volgens mnr Coetzer het dit 'n baie goeie indruk geskep.

Die Wapad het mnr Mike Heine, die regisseur van die program, genader om uit te vind hoekom die program nie op die geskeduleerde tyd gebeeldsaai is nie. Volgens hom was die program tegnies onaantoonbaar en was daar "onderliggende redes waarvoor 'n mens nie graag praat nie".

Mnr Heine het laat weet dat die deelnemers van die program weer genader sal word vir nog 'n probeerslag.

## Hulpprojek

HULPPROJEK bied 'n gulde geleentheid aan studente om naaste diens te lewer wanneer hulle van 28 November tot 10 Desember 'n besoek aan Tzaneen bring.

Die feit dat daar twee kerke te bou is en nog een om te voltooi, spel baie harde werk waarvoor ongeveer vyftig persone benodig word. Die koste bedra R25,00 per persoon en daar kan geskiet word tussen 29 September en 3 Oktober van 13h00 tot 14h00 voor die kafeteria.

Kom skiet betyds en maak deel uit van hierdie puik onderneming.



## Beeldende Kunste

## Letterkunde

## Musiek

## Teater

Kuns-  
vereniging  
beleef  
onvergeetlike  
toer

**DIE Kunsvereniging het Maandag 15 September, 'n onvergeetlike toer na Pretoria onderneem.**

Die Tukkie se studentekunsuitstalling is besigtig en die algemene indruk van die uitstalling lewer 'n gevoel van oorspronklikheid, individualiteit en beheersing van verskillende media en tegnieke. Veral die ontwerp-kuns-afdeling dra groot meriete. In die uitstalling word klem gelê op probleemstelling, die oplossing van die probleme en praktiese uitvoerbaarheid van idees.

Prof Roos, hoof van die Kunsdepartement van die Universiteit van Pretoria, het die toergroep deur die ateljees

geneem. 'n Vergelyking tussen Tukkie en PU kan nie getref word nie, omdat benaderingswyses verskil.

Tukkie is meer kommersieel en prakties ingestel as die PU.

Mev Titia Ballot se uitstalling van grafiese werk is besigtig in die Volkskasgebou. Die tema van die uitstalling is Ruimte en Tyd. Die gebruik van fossiele en geraamtes speel 'n baie belangrike rol. Die veelsydigheid van die grafiese tegnieke is merkbaar, deurdat een idee se potensiaal op verskillende wyses in 'n kunswerk ontbloot is.

Die kunsvereniging beplan meer aksies waarvan 'n toer Kaap toe moontlik die hoogtepunt is.

# Kunskalender

**ODITORIUM:** Die Kingsingers tree Woensdagaand 1 Oktober om 20h00 in die auditorium van die Studentesentrum op.

**PU KAMERTONEEL:** Die Dept. Spraakleer en Drama bied vanaf 29 September tot 3 Oktober om 18h30 "Lentevonkel" in die foyer van die PU Kamertoneel aan. Ralph Rabie o.l.v. Joe Coetzee sing "luisterliedjies van oraloer". Kaartjies is beskikbaar teen R1,50.

**POTCH INRY:** Vrydag 26 tot Saterdag 27 September. 1ste vertoning (19h00) "Double take" met Tony Curtis in die hoofrol. 'n Film waarin die dobbelwêreld met sy kullery en bedrog uitgebeeld word. 2e vertoning (21h00) "Old boyfriends" met Talia Shire in die hoofrol. Die storie van 'n meisie se kerele van haar jeug. Die een was haar leermeester, die een het haar verkul en die ander ou het haar lief gehad!

**STER-KINEKOR TEATERS:** Vrydag 26 en Saterdag 27 September. Kine 1: "The gods must be crazy" met Marius Weyers en Sandra Prinsloo in die hoofrolle. Hierdie film is weereens 'n treffer van Jamie Uys. Kine 2: "Can't stop the music" waarin Village People se geskiedenis en hul opkoms uitgebeeld word.

## Moeite loon sukses

# Alabama bou PU-beeld

— A van der Werken —

EN weereens was die Potchefstromers weer so voorreg om Alabama in die ouditorium te kan sien optree. 'n Mens het dan ook weer opnuut onder die besef gekom van die geweldige omvangrykheid wat met so 'n produksie gepaard gaan.

Daar moet byvoorbeeld noukeurig gelet word op die keuse van die kostuums sodat dit die gees van die betrokke "toneel" kan weerspieël en ook almal pas (dit het dan inderdaad ook), verder word daar ure gespandeer aan die choreografie sodat ook dit kan meewerk om die produksie tot 'n geheel te omskep. Die beplanning van die dekor en beligting moet dan ook nie agterweë gelaat word nie omdat dit ook van kardinale belang is as mens in ag neem dat so 'n produksie ook 'n geweldige impak het op die visuele. Met so 'n produksie

gaan daar natuurlik ook baie administratiewe werk vooraf wat gewoonlik min lof ontvang wanneer daar lof uit te dele is.

Die reklamewaarde wat Alabama het is nie in geld te meet nie. Só kom menige matrikulante na die PU met 'n Alabama-ideaal, veral as hulle eers kennis gemaak het met die lewenslustigheid, kleurvolheid en aanskoulikheid van die groepie studente.

Jans Jonker het goed daarin geslaag om die hoë standaard wat sy voorgangers daar gestel het, te handhaaf.

Veral die twee "tonele", oorlog en Broadway verdien spesiale vermelding. Dit was van 'n hoogs professionele gehalte vir sover dit die musiek, kostumering, keuse van liedere, beligting en die aanbieding in geheel aangaan. Veral die kostumering in die oorlog-deel het 'n sterk visuele aanslag gehad.

Soliste wat uitgesonder moet word vir hul puik vertolkings, is Lucille du Plessis vir haar vertolking van "Toemaar, die donker man" en die puik vertolking van die Nederlandse lied "Ik zou wellis willen weten" deur Danie Enslin. Sommige soliste het egter nie heeltemal die mas opgekrom nie omdat hulle nog nie die mikrofoon leer hanteer het nie.

Alhoewel Alabama 'n unieke groep in die Afrikaanse musiekwêreld is ten opsigte van hul eie stem wat hulle die wêreld indra, kan daar tog gevra word of hulle nog nie met die nuwe stem in die Afrikaanse liriek kennis gemaak het nie. Die keuse van sommige van die stukke het weliswaar afbreuk gedoen aan geslaagdheid van die geheel. Hoe lyk dit met 'n bietjie kreatiwiteit uit die Alabama-geleedere? Sekere van die liriek dateer uit 'n moeiliker tydperk in die Afrikaanse liriek, soos by "Transvaal is weer in moeilikheid".

Die choreografie het plek-plek slordig vertoon. Die fout kan miskien gesoek word by die studente wat nie altyd die musiek en danse tegelyk kon baasraak nie en nie soseer hy die choreografe nie.

Die komediante was plek-plek maar teleurstellend en hier is miskien groot ruimte vir verbetering.

Die feit bly egter staan dat Alabama in die geheel gesien, die moeite werd was om die hand in die sak te steek.

# Collegium wenners hou konsert

**OP Donderdagaand, 18 September, het die pryswenners van die pas afgelope Collegium Musicum-kompetisie, 'n konsert in die Konservatoriumsaal aangebied.**

Die pryswenners is as volg:

**SANG:** André Howard, Betsie Smith en Mientjie Lubbe.

**KLAVIER (Seniors):** Annelie Strydom, Marthie Smith. (Juniors): Salome Schmitz en André Hough.

**ENSEMBLE (Seniors):** Marthie Smith en Annelie Strydom. Annemarie van der Walt en Elsie Schutte. (Juniors): Olive Coetzee, Heleen Hough en André Hough.

**ORKESINSTRUMENTE:** Martha d'Assonville (hobo) en Millie d'Assonville (klarinet).

**ORREL,** Susan Yssel.

Die konsert is gekenmerk deur 'n hoë standaard wat deurgaans deur die pryswenners gehandhaaf is. Die Klaviertrio in D min (eerste beweging) van Mendelsohn; André Howard se vertolking van liedere van Beethoven en Brahms en die twee wenners van die senior afdeling in klavier, het getuig van artistieke volwassenheid.

Die konsert is op 'n

hoogtepunt afgesluit deur Annelie Strydom en Marthie Smith se vertolking van Milhaud se Scaramouche vir twee klaviere.

## Leipoldt- aand

**DIE Departement Afrikaans-Nederlands het in samewerking met die Akademie vir Wetenskap en Kuns, op Maandag 14 September 'n Leipoldt-aand in die A Restaurant van die Studentesentrum aangebied.**

By dié geleentheid het studente van die Departement Spraakleer en Drama verse van Leipoldt voorgedra. Hulle het ook 'n leesaanbieding van "Die laaste aand" aangebied.

Mnr Hein Viljoen van die Departement Afrikaans-Nederlands was die geleentheidsspreker. In sy insiggewende toespraak het hy verskeie vreemde begrippe van Leipoldt verduidelik.

Prof H Venter het na die lesing 'n dankwoord tot mnr Viljoen gerig.

Gereggies volgens repte van Leipoldt is deur die Departement Huis-houdkunde voorgesit wat die aand se verrigtinge afgesluit het.

## DIE WAPAD DIE WAPAD DIE WAPAD

### Vakature:

## Administratiewe Bestuurder (Halfdag)

### 1. Pligte

- behartig die administrasie van Die Wapad
- is die kernredaksie, advertensiebestuurder en penningmeester behulpsaam in die uitvoering van hulle pligte
- is behulpsaam met interne en eksterne skakeling
- behartig die verspreiding van Die Wapad

### 2. Werksomstandighede

#### Die Administratiewe Bestuurder

- is direk verantwoordelik aan die Hoofredakteur
- werk jaarliks vanaf die begin van die week voor die eerste uitgawe ter perse gaan tot die einde van die week waarin die laaste uitgawe verskyn
- werk nie tydens amptelike universiteitsvakansies en eksamentye nie
- moet 'n totaal van vyftien uur per week op vaste tye soos vooraf met die Hoofredakteur ooreengekom, werk, met dien verstande dat dit oor minstens vier dae van die week versprei word.

### 3. Aanbevelings

- Vorige soortgelyke ondervinding
- Kennis van administrasie en bestuurswerk
- Kennis van en ondervinding in die georganiseerde studentelewe
- Vaardigheid in tik

### 4. Salaris en voordele

- Die salaris is R30,00 per week (slegs vir ure gewerk)
- Benewens vakansie- en eksamentye word nog tien dae verlof per jaar toegestaan

### 5. Diensaanvaarding

Die begin van 1981

### 6. Aansoek

- Knip die aansoekvorm uit en stuur dit voor Saterdag 11 Oktober 1980 aan: Die Redakteur, Die Wapad, PU vir CHO, Potchefstroom, 2520.
- Getuigskrifte en bewyse van kwalifikasies en ondervinding moet aangeheg word
- Nadat die aansoek ontvang is, sal aansoekers genader word vir persoonlike onderhoude
- Mans en dames is welkom om aansoek te doen

### 7. Verdere inligting kan verkry word by:

Izak Minnaar  
Oude Molen w/s 108  
Molenstraat 83  
POTCHEFSTROOM  
Tel. 21576

Ek wil graag aansoek doen vir die pos van Administratiewe Bestuurder by Die Wapad. Hier is my besonderhede:

Naam: Mnr/Mev/Mej. ....

Adres: ..... Tel: .....

Studentenommer: ..... Ouderdom: .....

Vorige ondervinding: .....

.....

Studierigting/beroep: .....





● Mariska Spoomaker aan die woord tydens Studenteparlement wat op Woensdag 17 September gehou is. Werner Eksteen (speaker) en Marina van Vuuren (hansardskrywer) kyk toe. Diskussies is gevoer oor damesstemreg in die SSR-verkieping. (Berig elders op bladsy)

## Studenteparlement se struktuur gewysig

Studenteparlement ondergaan 'n struktuurverandering om meer verteenwoordigend te wees.

Die bestuur van Studenteparlement stel

homself ten doel om Studenteparlement in die komende jaar baie formeel te laat lyk en te laat optree. Na die voorbeeld van die Studenteparlement op Stellenbosch, word die invoer van togas

vir parlamentslede en 'n vaandel beplan.

Daar word ook beoog om elke sitting van Studenteparlement 'n prestige geleentheid te maak, maar alle studente wat teenwoordig is sal nogtans kans hê om hulle menings te lug oor die betrokke aangeleentheid wat tydens die sitting bespreek word.

Studenteparlement sal die enigste studente-organisasie wees wat politieke uitsprake namens die PU kan maak. Dit is omdat die liggaam in 'n groot mate verteenwoordigend van die studente-massa is. Koshuisverteenvoerders uit elke koshuis sal sitting hê as parlamentslede.

Die uitsprake wat deur die Studenteparlement gemaak word, sal aan die SSR 'n aanduiding gee hoe die studente-massa oor sekere aangeleenthede voel.

Lede van die pers sal genooi word na die sitting om sodoende van die besluite na buite weer te gee.

Daar sal van koshuisverteenvoerders verwag word om 'n meningsopname in sy koshuis te maak oor die aangeleentheid wat bespreek gaan word in die volgende Studenteparlementsitting. Sodoende kan die siening van die studente-massa die beste na vore gebring word.

## Brandpunt maak polities bewus

BRANDPUNT, een van die onderliggame van Politiese Raad, se doel vir die nuwe termyn is

onder andere om die Puk-student polities meer bewus te maak van die wêreld om hom.

Lindie Steyn, die nuwe voorsitster van Brandpunt, sê sy is van voorneme om die funksionering van Brandpunt in die nuwe termyn meer effektief te maak. Dië besprekingsgroep sal hulle vanjaar weer toespits op interessante aktuele sake, soos uiteengesit deur outoriteite op hulle gebiede — dr P Mulder, dr D de Klerk, prof J J van Tonder, en prof C P van der Walt.

Lindie sê sy stel dit haar ten doel om die belangstellende Puk-student die geleentheid te gee om onderrig te ontvang, asook menings te wissel sodat sy politieke denke gestimuleer kan word en hy sy eie opinie aangaande aktuele sake kan vorm.

## Karnaval '81

# beloof om groot te wees

**KARNAVAL '81** beloof om iets groot te wees, hoofsaaklik om die groot verandering in struktuur. Die hoogtepunt van die herstrukturering is onder andere sentralisering van alle karnaval-aktiwiteite op die Fanie du Toit-sportterrein, met die uitsondering van die openingsaand, wat op die kampus plaasvind.

die Suid-Afrikaanse Weermag (plaaslik) te oorweeg vir 'n vlot-inskrywing.

● Mooirivierspele, spesifiek die boersport-afdeling, inter-universitêr aan te bied en sodoende die SAUK teenwoordig te kry. Die Vaalriviertak sal ook betrek word.

● Implementering van 'n HK-lid van elke koshuis van die Universiteit,

wat ten volle verteenwoordigend op karnaval-komitee sal bekom en alle karnavalaksies (en sake) in sy koshuis sal hanteer.

● Die instel van 'n busroete van verskeie versamelpunte op die kampus na die karnavalplaas — spesifiek dan die vlotbougebied. Die diens sal gratis verskaf word vanaf 06h00 tot 24h00.

● Reklame- en inligtingsveldtog vir karnaval '81 vir 'n groter aantrekkingskrag na karnaval-aktiwiteite, deurgee van inligting, ook aan die publiek oor die presiese en uiteindelijke doel van die grootskaalse fondsin-sameling van karnaval. Hier het karnaval-komitee gedink aan ons eie karnavalblad, Die Pukkies Junior, wat aangewend sal word vir daardie doel.

Die karnavalkomitee wil graag 'n karnaval-plaasatmosfeer op die Fanie du Toit skep, wat sal sorg vir gesonde ontspanning. Verskeie nuwe karnavalaksies en ou aksies wat nuut ingekleur is, word alreeds beplan deur die konvenors van Karnaval '81-komitee.

Karnaval-komitee '81 is ook besig om baanbrekerswerk te doen deur verskeie nuwe stelsels vir karnaval in werking te stel en sodoende te sorg dat aksies meer suksesvol gedurende karnaval aangebied word.

Dit sluit stelsels in soos:

- Rekenaarisering van alle karnaval-aksies, wat insluit kontrole van verkope, voorraad, kontant en ook die deurlopende stand van punte van die verskillende koshuise. Die stelsel kan tot gevolg hê dat finale puntestand 'n halfuur nadat die laaste karnavalaksie voltooi is, beskikbaar sal wees.

- Die skepping van 'n karnavalplaas, waar alle aksies sentraal sal plaasvind byvoorbeeld veldflics, Mooirivierspele (sport en sports), gesentraliseerde vlotbou-gebied en ook moontlik 'n nasionale trapkarwedren op die eerste en enigste spesiaal geboude trapkarbaan. Uitsluitel oor groter aksies in nog nie bereik nie.

- Van die vloptog 'n sukses te maak deur ook akademiese vereniging en 'n verteenwoordigende groep van

## Studenteparlement praat oor damesstemreg

**ONBETROKKE** damesstudente stem by SSR-verkiepings vir manskandidate met breë glimlagte en mooi gesigte.

Dit was die groot strydpunt op die Studenteparlement van Woensdag 17 September wat gehandel het oor die feit of damesstudente stemreg vir die SSR moet hê of nie.

Daar is veral klem gelê op die onbetrokkenheid van damesstudente. Dit blyk uit die feit dat slegs 30% van die verenigings se bestuursposte deur dames gevul word. Die feit dat dames so onbetrokke by die studentelewe is, gee daartoe aanleiding dat hulle nie genoeg weet van die studentelewe om die vermoë te hê om 'n goeie stem vir die SSR-verkieping uit te bring nie.

In reaksie hierteen is daar opgemerk dat dit nie net dames is wat hulle skuldig maak aan onbetrokkenheid nie, maar dat daar ook baie skuldiges onder die mansstudente is.

Dit is dus gruwelik onregverdig om as gevolg van veralgemening van onbetrokkenheid, dames hulle stemreg te ontnem. As onbetrokkenheid as norm geneem word, sal 'n groot persentasie van

die mansstudente ook nie stemreg hê nie.

Na 'n hewige debat is die volgende mosies aanvaar:

1. a) Dat stemreg aan mans en dames op meriete toegeken moet word. b) Dat persone wat nie die nodige stemkwalifikasies het nie geen reg het om teen die SSR-uitsprake en -besluite te appeleer nie (Die mosie is algemeen aanvaar)

2. Dat by die volgende SSR-verkieping die verkiesingslokale gedentraliseer sal word (Die mosie is met 'n meerderheid van stemme aanvaar).

3. Aangesien onbetrokkenheid 'n groot probleem op die kampus is, en aangesien die probleem nie beperk is tot die dames op die kampus nie, spreek hierdie parlement hom uit: a) Teen die afskaffing van damesstemreg. b) Ten gunste van 'n positiewe poging om alle studente betrokke te kry, onder andere deur middel van desentralisasie (Die mosie is met 'n meerderheid van stemme aanvaar).

Die Studenteparlement spreek homself dus uit ten gunste van die stemregkwalifikasies van beide mans- en damesstudente. Die kwalifikasies vir stemreg is egter nie bespreek op hierdie sitting van studenteparlement nie.

## Kampus-Fokus weer gehou

**DIE** jaarlikse **Kampus-Fokus-kamp** sal vanaf 19 Januarie 1981 by die Kultuursentrum naby Rustenburg gehou word. Dr Pieter Mulder sal waarskynlik weer as kursusleier optree.

Volgens Mario Smith, SSR-lid vir Opleiding, sal die kamp aanvanklik net deur die SSR, die primis, die raadsvoorsitters, die Wapadredakteur en die

Karnavalvoorsitter bygevoeg word.

Die uitvoerende komitees van die rade, die verskillende koshuise se HK-lede en res van die SSR-komitees sal eers vanaf Woensdag, 21 Januarie, die kamp bywoon.

Mario Smith sê dat daar basies dieselfde program as by die vorige kampe gevolg sal word. Daar sal egter nie weer besluite oor oriëntering op die

kamp geneem word nie, maar wel op die RKK-aand wat eersdaags gehou sal word.

## Skoonmaak

Vir die skoonmaak van die administratiewe en akademiese geboue het die Raad besluit om van 'n skoonmaakdiens gebruik te maak.

Die kontrak is aan mnr Philip Malan-Skoonmaakdiens toegeken. Hierdie oorskakeling het reeds vanaf 2 September 1980 in werking getree.

## Pukkies sluit vrolik af

OP Woensdag, 17 September, het die Pukkies hul aktiwiteite vir die jaar op 'n vrolike noot afgesluit.

Hulle het hul afsheidsfunksie in die vorm van 'n braaivleis op die Fanie du Toit-sportterrein gehou. Vir oulaas het 1980 se Pukkies bymekaar gekom. Dieselfde aand is die Pukkies se nuwe leidster vir 1981 gekies, naamlik Magel Weber. Die hulpleidster is Marinda Coetzee.

Die Pukkies was die beste wat dit nog ooit was op die PU. As hulle voortbou op dit wat hulle hierdie jaar gedoen het, kan dit alleen tot groter sukses lei. Ons kan trots wees daarop dat die Pukkies so 'n positiewe beeld kon uitdra, en die mense van buite nie met afkeer na hulle gekyk het nie. Die kleredrag veral, was baie goed. Die inisiatief en die maak van die kleres het die Pukkies self gekom.

Die Pukkies se laaste optrede was tydens Yskor se karnaval op 6 September 1980.

**MODEL-SKOENWINKEL —**  
**CHECKERS-SENTRUM**  
en  
**SKOENSENTRUM —**  
**KERKSTRAAT**

Vir die jongste modes in skoene



OIP-105113



# die WAPAD

## ● Mothsaaldanse

Die eienaars van die Mothsaal het besluit om die saal nie meer aan studente beskikbaar te stel nie op grond van rusverstoring. Dit spruit blykbaar voort uit die gedrag van sekere studente na die Groot Brag en die biertuin voor Intervarsity.

Die rektor, prof Tjaart van der Walt, se kommentaar daarop is dat dit die eienaars se goeie reg is om so 'n besluit te neem. Hy het dit pertinent gestel dat hy geen verbod op dans buite die kampus stel nie.

Daarom word dit betreur dat gerugte versprei word wat daarop neerkom dat die rektor "reëlings getref het" dat die danse verbied moet word. Dit is die organiseerders se verantwoordelikheid om te sorg dat dinge nie hand uitruk nie en as dit wel gebeur moet hulle die skuld daarvoor en die gevolge daarvan op hulleself neem.

As dit onmoontlik is om dit te beheer, moet die aanbieding van die danse in heroorweging geneem word omdat optrede soos dié na die Groot Brag net die naam van die PU vir CHO skaad.

## ● Televisievasvraprogram

Die PU het in die televisieprogram "Waar is ons" baie goed gevaar en ook baie goed vertoon in vergelyking met hul opponente van RAU. Die telling (61 teen 23) asook die gehoor vol Pukke spreek daarvan.

Die program is nie op die geskeduleerde tyd gebeeldsaai nie, blykbaar as gevolg van tegniese probleme. Die bestaan van ander onderliggende redes is egter deur mnr. Mike Heine, die regisseur van die program, aan Die Wapad erken.

Dit is ons mening dat die SAUK-TV die ander redes moet bekendmaak aangesien die PU baie sou kon baat by die uitsaai van die program.

## ● Administratiewe Bestuurder

Die SSR het verlede week die skep van die pos van 'n Administratiewe Bestuurder by Die Wapad goedgekeur. Hierdie persoon sal die administrasie van Die Wapad behartig. Die aanstelling van 'n permanente persoon by Die Wapad kan gesien word as deel van die proses van sistematiesing, rasionalisering en vaartbelyning van die redaksie wat daarop gemik is om Die Wapad al hoe meer professioneel te bedryf. Dit alles is noodsaaklik ten einde 'n beter produk aan die Pukstudent te lewer.

## Uit die Woord

1 Thessalonicense 5 :2

Soos 'n Dief in die Nag

Dietsaal is 'n groot probleem

Mense bestee duisende rande aan diefstal en diefstal. Alles maatreëls om ons besittings teen diefstal te beskerm.

**DIE WEDERKOMS:** Paulus sê: Die dag van die Here kom soos 'n dief in die nag. Die Dag van die Here — dit is Christus se Wederkoms. Ons bely elke Sondag: Hy sal kom om te oordeel die lewende en die dode. Daardie dag wanneer Jesus sal kom om die wêreld en die mens te oordeel, kom soos 'n dief in die nag.

Wanneer, weet ons nie. Wat ons wel weet, dit is IN DIE "NAG". Die nag, wanneer dit donker is — wanneer die wêreld nagswart is van sedelike verval en geestelike donkerte. Jesus kom wanneer die wêreld se maat vol is — wanneer die klok vir die wêreld twaalf slaan.

**DAG IS LIG.** Die DAG van die Here is die Nag. Die dag is lig. Die dag — die lig — kom in die duisternis en deurdring dit en lê alles bloot — al die ongehoorsaamheid en boosheid van die mens. Die "lig" van dié dag sal ook deurdring tot in die diepste skuilhoeke van jou en my hart.

**ONVERWAGS 'n Dief** stuur nie vooraf 'n boodskap om te sê hy sal daardie en daardie tyd kom, sodat jy jou besittings kan wegbêre nie!

'n Dief kom onverwags. Diegene wat voorsorgmaatreëls getref het, het niks te vrees nie, maar die Sorgeloses — dié wat met oop deure slaap — hulle sal die gevolge dra.

Stel jy nog uit om jou lewe te "beveilig" teen die koms van die dag van die Here? Stel jy nog jou bekering uit: later is nog tyd — môre — altyd môre.

Neer! môre kan te laat wees. Môre kan vir jou dalk nooit kom nie. Wat moet ek doen om gered te word, vra die tronkbewaarder aan Paulus (Hand 16 :31). Glo in die Here Jesus en jy SAL gered word.

Moenie uitstel nie — die nag van die Here kom onverwags soos 'n dief in die Nag.

Wees elke oomblik gereed!

"DANCE IN A BOTTLE" ONS VERNEEM  
DIE WARE OORSAK VIR DIE MOTH-SAAL  
DANSVERBOD, IS DIE SWAK GEDRAG VAN STU-  
DENTE A.O.V. DRANKHESBRUIK.



# Christen het 'n taak in arm wêreld

— Johann Walters —

REEDS so vroeg as 1776 het Adam Smith op 'n keer gesê dat geen gemeenskap waarvan die grootste deel arm en ellendig is kan floreer en gelukkig wees nie. Met dié gedagte vars in ons geheue moet ons as toekomstige leiers opnuut die konsekwensies besef van die steeds groter wordende wêreldarmoede. Daar staan geskryf "Julle moet nie elkeen na sy eie belange omsien nie, maar elkeen ook na die ander s'n. Want hierdie gesindheid moet in julle wees wat in Christus Jesus was ... deur die GESTALTE VAN 'n DIENSKNEG AAN TE NEEM en aan die mense gelyk word" (Fil 2:4-8).

## Bevolkingsontploffing

Adam Smith het by James Grant, President van die "Overseas Development Council", aangesluit toe hy gesê het "The central issue of our time may well turn out to be how the world addresses the problem of over expanding human numbers." Die gedagte moet nie alleen gesien word as 'n "rangskikking van 'hogere' woorde nie", maar moet eerder gesien word as 'n beskrywing van die realiteit. Die geprojekeerde bevolkingstasie toon onteenseglik dat die woorde van Grant die omskrywing van realiteit is. In die jaar 2000 sal die bevolking op 'n geraamde 6 500 miljoen mense te staan kom. Dit is 4 020 miljoen meer as vyftig jaar gelede, toe die bevolking van die wêreld 2 480 miljoen was. Die saak wat die meeste kommer wek, is nie soseer die hoër wêreldbevolking nie — dit wel — maar die feit dat 81,2% van hierdie bevolking in minder ontwikkelende lande sal woon en arbeid. Voortspruitende uit hierdie probleem is die feit dat 5 278 miljoen van die wêreldbevolking in die jaar 2000 gaan woon in minder ontwikkelde gebiede wat geken word aan 'n hoër graad van armoede. In hierdie minder ontwikkelende lande is slegs 10-18% van die bevolking geletterd — dit impliseer dat in die jaar 2000 ongeveer 1 055 miljoen van die 5 278 langer as twee jaar formele skoolopleiding sal ontvang. Daarteenoor is 97% van die bevolking in ontwikkelende lande geletterd. Dit is voorwaar 'n toonbeeld van wêreld ongeletterdheid en aanverwante wêreldarmoede.

## 'n Wêreld van Armoede

Uit bogenoemde sal dit vir u as leser

duidelik wees dat die wêreld neig na 'n staat van materiële verval. By hierdie gedagte wil Padma Desai van die Harvard University aansluit as hy sê: "The Third World (minder ontwikkelde lande) is important because of the massiveness of the poverty". Watter armoede bestaan daar nie! Hierdie armoede is gekoppel aan die grootskaalse bevolkingsontploffing. Dit neem sulke groot afmetings aan dat die minder ontwikkelde lande se bevolkingsgroei 100% hoër is as in ontwikkelde lande.

Jaarliks word daar in eersgenoemde lande veertig inwoners vir elke duisend inwoners bygevoeg. Dit bring mee dat 50% van die minder ontwikkelde lande se bevolking onder die ouderdom van vyftien jaar is. 'n Verdere 16% van die bevolking is om een of ander rede ekonomies onaktief. Dit bring mee dat 33% van die totale bevolking ekonomies aktief en in staat is om om te sien na die totale bevolking. In die vroeë sewentigs is die totale wêreldproduksie byvoorbeeld gewaardeer teen 3 200 000 miljoen dollar, waarvan 2 700 000 miljoen dollar geproduseer is in ontwikkelde lande, terwyl 500 000 miljoen dollar in minder ontwikkelde lande geproduseer was. Indien dit vergelyk word met die totale wêreldbevolking beteken dit dat 85% van die wêreldinkomste geskep is deur ontwikkelde lande en wel deur minder as een derde van die wêreldbevolking. Meer as tweederdes produseer slegs 15% van die totale wêreldproduksie.

Hierdie toestand skep 'n teelaarde vir 'n kringloop van armoede. Die relatiewe groei in die bruto nasionale inkomste van minder ontwikkelde lande was byvoorbeeld in die tydperk 1965 tot 1974 1,1% terwyl die 55 ontwikkelde lande 'n groei van 3,3% getoon het. Hierdie diskrepansie tussen ontwikkelde en minder ontwikkelde lande word vergroot deur die bevolkingsaanwas van 25% in minder ontwikkelde lande terwyl die ontwikkelde lande se bevolking slegs met 8% gestyg het. Dit skep 'n ontwikkelingsgap van 2% wat impliseer dat die ontwikkelde lande vinniger groei as die minder ontwikkelde lande en dat laasgenoemde al slegter daaraan toe is.

Ten spyte van hierdie dalende welvaart in tweederdes van die wêreld moet die voedselproduksie in minder as 20 jaar van nou af met 100% toeneem. Die teken van gevaar is lank reeds sigbaar. Tans is daar 1 000 miljoen mense — 'n kwart van die mensdom — gedeeltelik of heeltemal armoedig en ondervoed. As voorbeeld kan daar vermeld word dat die

proteïneverbruik per dag, per inwoner in minder ontwikkelde lande 50 gram teenoor die 97 gram in ontwikkelde lande. Die gebruik van koring in minder ontwikkelde lande is 180 kg per kapiteel per jaar, teenoor die 650 kg in ontwikkelde lande. Hierdie graad van "onvoeding" skep 'n lae gesondheidsstand. Die gemiddelde leeftyd van inwoners van minder ontwikkelde lande is 43 teenoor die 71 jaar wat inwoners in ontwikkelde lande kan leef. Hierdie stand word vererger deur die swak mediese dienste. Vir elke 3703 inwoners in minder ontwikkelde lande is daar mediese dokter terwyl een mediese dokter in ontwikkelde lande vir 740 inwoners voorsien van mediese hulpe-teken van armoede.

## Suider Afrika

Die betoog hierbo gelewer was betoog vir u as jong Suid-Afrikaner aangesien u as inwoner van 'n ontwikkelde land soos Suid-Afrika. Dit was ook die bedoeling om vir u as inwoner van 'n ontwikkelde land te betoog dat, soos wat die uitgangspunt was, as bevoorregte burger iets het om te betoog met mindervevoorregtes in ons land. Om dit te kan doen, hoef u nie ver te gaan soek nie — Suider Afrika ook tekens van onderontwikkeldeheid. Suid-Afrika is 89% van die bevolking geletterd terwyl 15% in Malawi, 25% in Swaziland, 18,4% in Botswana; 7% in Mosambiek en 30% in Angola geletterd en dus langer as twee jaar formele leiding ontvang het. 'n Verdere verlyking kan die graad van diskrepansie tussen Suid-Afrika en die res van Suider-Afrika aandui. Die inkomste per kapita in Suider-Afrika is R1 148 teenoor die R130 in Malawi, R280 in Lesotho, R401 in Kwa-Zulu, R230 in Bophuthatswana, R230 in Transkei en R157 in Swaziland. Dit is slegs enkele voorbeelde vermeld.

## 'n Christen-dinamika

As christen moet ons GESOUT wees in ons beginsels en handlinge. Ons moet toesien dat die wêreld nie SMAAK en sonder enige waarde raak nie. 'n Christen die SOUT van die aarde moet hy deur sy handlinge die aarde sy inwoners SMAAKVOL maak — moet die mens ophef. Dié kenmerk van die christen 'n dinamiese mens



# Rektor vir nog drie jaar herkies

DIE Rektor en Vise-Kanselier van die PU vir CHO, prof Tjaart van der Walt, is deur die Raad van die Universiteit vir 'n verdere termyn van drie jaar herkies.

Die besluit is bekend gemaak tydens 'n perskonferensie wat gehou is op Donderdag 18 September.

Die Raad het ook besluit om dr L M du Plessis van Regsfilosofie en dr J G Smith van Bedryfsadministrasie tot professore te bevorder. Tot mede-professore is bevorder dr J A K du Plessis, (Chemiese), dr M L Hugo (Geografie), dr S W Krügel (Bedryfs- en Personeelsielkunde), dr J P L Reinecke (Fisika), dr H S Steyn (Statistiese Konsultasiediens), dr D P Venter (Farmakologie) en mnr I Vorster (Privaatreg).

**Loonverhogings**  
Die Raad het verder besluit om na aanleiding van verhoogde loonkale vir blankes, ook die swart werknemers se lone met plus minus 15% te verhoog, terugwerkend vanaf 1 April.

Die Raad het ook besluit op die stigting van 'n sentrale publikasie-afdeling, waar alle drukwerk, publikasies, diktate, fotokopieë, ensovoorts sover moontlik in een afdeling gekanaliseer sal word.

### Komitee vir toesighouding

Daar word beoog om 'n sentrale komitee te stig wat monitor hoe effektief die Universiteit sy werk doen. Die ou komitee vir Ontwikkeling sal tot so 'n komitee omskep word. Sy taak sal die volgende wees: Om die Raad van advies te bedien oor die optimale ontwikkeling beide oor kort en lang termyn en om advies te gee oor die strategie van totale optrede van die PU vir CHO as geheel, funksies om ontwikkelingsgeleenthede in Suid-Afrika en in die buiteland in terme van studierigtings, navorsing, en indiensmoontlikhede te identifiseer en aanbevelings te maak, om interne struktureel aspekte wat in sodanige ontwikkelingsmoontlikhede na vore kom, daarmee in verband te bring, om skakeling te bewerkstellig tussen eksterne en interne institute, ensovoorts.  
Daar is voorts besluit om sowel klas- as losies-

gelde vir 1981 te verhoog. Wat die verhoging presies sal wees, is egter nog nie seker nie. Daar sal gepoog word om te differensieër tussen die klasgelde van verskillende fakulteite.

Daar is besluit om vyf beurse van R1 000 elk aan fisiesgestremde persone beskikbaar te stel.

### Wasoutomate

Die Raad het ook besluit

om na aanleiding van proefnemings wat reeds gedoen is, wasoutomate by die koshuise te installeer. Die strykwerk sal egter deur die studente self gedoen moet word.

Die Raad het prof L F (Ludi) Schultze beroep as professor in Dogmatiek in die plek van prof Peet Coetzee.

## Piekniek vir E.S. le Grange

**DIE SGD kon op Saterdag 20 September op 'n baie gesellige en informele wyse nouer kontak maak met leerlinge van die E.S. le Grange Sentrum vir verstandelike gestremde kinders. Hulle het naamlik 'n piekniek vir die seuns en meisies afsonderlik gereël en vertel dat dit 'n groot sukses was.**

Volgens mnr Louis van der Linde, een van die organisateurs, vind daar uiters min georganiseerde aktiwiteite op Saterdag rondom die sentrum se koshuise plaas. Dit is juis hierdie feit wat aanleiding gegee het tot die piekniek-aksie.

Saterdag om 08h30 is 19 seuns na die Piet Bosman Trimpark geneem en die oggend se verrigtinge het begin met 'n staptoer al langs die Mooirivier. Daarna het leerlinge die Trimparkoefeninge gedoen en 'n vrugte-ete geniet. 'n Soortgelyke aksie is met die meisies by die Boshoff-dam gehou.

Nie alleen kon die kinders 'n kykie kry in 'n gemeenskap wat anders is as dié waaraan hulle gewoon is nie, maar terselfdertyd kon hulle ook liggaamlik baat daarby vind. Mnr Willem Fourie, SSR-lid vir SGD, sê dat dit 'n goeie voorbeeld is vandie tipe diens wat studente aan die gemeenskap kan lewer. Hy sê ook dat daar 'n geweldige behoefte is aan persone om diensdoenende onderwysers op Saterdag by die koshuise te gaan uit-help. Belangstellendes kan gerus vir Annamie Ondaal kontak by die SSR-kantore.

# Pers se verantwoordelikheid is kongrestema

'n **Kommunikasie-kundekongres** word op 2 en 3 Oktober in die Sinodesaal op die hoek van Molen- en Meyerstrate, deur die Suid-Afrikaanse Kommunikasiekundige Vereniging aangebied.

Die tema van die eerste

dag is **Kommunikasiekundige vakwetenskaplike probleme** en sal deur kommunikasiekundiges en verteenwoordigers van studente van Suid-Afrikaanse universiteite en belangstellendes bygewoon word.

"Hoe verantwoordelik is die pers?", is die tema vir

die tweede dag. Verteenwoordigers van die Swart, Engelse en Afrikaanse pers en verteenwoordigers van ander kommunikasie-inrigtings sal die kongres saam met die vorige dag se aanwesiges bywoon.

'n Uitstalling van foto's en spotprente van die jaar wat in koerante verskyn het, en foto's van die SAUK en waarskynlik ook foto's van die ou Potchefstroomse pers sal gehou word. Die uitstalling is die eerste in sy soort wat op so 'n kongres aangebied word. Dit maak dit dus die moeite werd om die kongres by te woon.

Spreekers wat sal optree is onder meer mnr L le Grange, minister van Polisie, mnr P G Snyman van die Komm.kunde dept. van die PU, en mnr T Myburg, van die Sunday Times, P G du Plessis van die Hoofstad en O Kunene van Elanga wat die Engelse, Afrikaanse en Swart pers sal verteenwoordig.

Toegang tot die kongres is gratis en alle belangstellendes is welkom.

## Fokusgroepe na buite gerig

**MNR WILLEM FOURIE, SSR-lid van Korpsraad, het Korps se nuwe Uitvoerende Komitee bekendgemaak en hom daarna uitgespreek oor 'n paar skurftes waaraan die Raad in die komende termyn wil staaf.**

Die **Uitvoerende Komitee van Korpsraad** vir die nuwe termyn soos verkies op 11 September is die volgende persone:

**Voorsitter:** Piet Fanoy;  
**Adjunk-Voorsitter:** Christo van Vuuren;  
**Vise-Voorsitters:** Koos Venter, Fanie Coetzee;  
**Sekretaresse:** Corlia Haasbroek; **Penningmeester:** Ben Liebenberg; **Skakelbeampte:** Tienie Swanepoel.

Mnr Fourie het gesê dat hy nie heeltemal tevrede voel oor die feit dat die opleidingstaak wat die onderliggaam **Aktueel**

voorheen gehad het, tans deur die SSR self vervul word nie. Hy sou graag wou sien dat **Aktueel** aanhou met spesifieke, toegespitste opleiding. Hieronder word verstaan kampe met 'n sekere tema, soos byvoorbeeld "Volksindentiteit". Mnr Fourie sê dat die onderliggaam **Aktueel** en Hulpprojek voorheen die "hart" van Korps was, maar dat dit tans nie meer die geval is nie. Hy sou graag wou sien dat hulle meer inspraak het op die Raad.

As gevolg van struktuurveranderinge is Fokusgroepe nie meer deur hul Voorsitter op Korpsraad verteenwoordig nie. Die rede hiervoor is bloot net dat daar reeds te veel Raadsverteenvoorders is wat die vergaderings bywoon. Mnr Fourie sê dat daar in hierdie opsig noodgedwonge nog struktuurverandering sal moet plaasvind.

Die valbyl het op die fokusgroepe geval, omdat hulle taak in die koshuise grootliks deur die kerklike jeugverenigings vervul word. Op die vraag waarom die groepe dan nog enigsins bestaan, het hy geantwoord dat dit hier gaan oor die gerigtheid van die jeugverenigings en fokusgroepe. Die kerklike jeugvereniging is meer binnewaarts gerig na die mense in die vereniging self, terwyl fokusgroepe meer 'n uitleiding na buite is. In hierdie verband het mnr Fourie dit beklemtoon dat Korps nie kerklik gerig is nie.

## Teologie

**PROFESSOR L F Schulze** van Hamanskraal sal vanaf 1 Januarie 1981 die nuwe leraar in Dogmatiek en Simboliek aan die Teologiese Skool wees. Hy sal die plek inneem van professor Coetzee, wat aan die einde van die jaar aftree.

Daar is vanjaar nege-en-veertig teologiese studente aan die PU. Van die nege-en-veertig is dertien eerstejaars, twintig tweedejaars (waaronder ook 'n dame), sewentien derdejaars en nege vierdejaars. Van die voornemende proponente moet ses studente nog militêre diensplig verrig. Die ander drie is dadelik beroepbaar.

Klasse aan die Teologiese Skool het reeds op Vrydag, 19 September 1980, afgesluit. Die eindeksamen sal op 25 September in aanvang neem.

### Mooi meisies en blomme pas bymekaar.....

Vir die roos van jou hart is daar:

VARS SNYBLOMME  
RUIKERS  
POTPLANTE  
DROË RANGSKIKKINGS  
KUNSBLOMME  
ORNAMENTE, ens

## huis & tuin

Tomstraat 82b, Die Bult  
Tel. 4641



Die omroepers en operateurs van Radio Puk in aksie tydens 'n uitsending. Daar is nou poste vakant vir aspirant omroepers en operateurs. Keuring vir belangstellendes sal by die Radio Puk ateljee plaasvind op die volgende dae: Woensdag 7 Oktober en Donderdag 8 Oktober om 18h30 tot 19h30. Operateurs kan by die ateljee kom reëlings tref vir opleiding.

Op versoek van die Rektor het die SSR besluit om toe te sien dat soveel as moontlik studente-aksies gedurende naweke sal plaasvind en dat die weksdae dus vir die akademie oopgehou sal word, maar dat een naweke per maand vir huistoegaandoelendes oopgehou sal word. Dit sal sorg dat daar genoeg ontspanning oor naweke is, dat die akademie die nodige prioriteit geniet en dat studente tog genoeg tyd kry om huistoe te gaan. Die naweke wat in 1981 oopgehou moet word, is 7 en 8 Maart en 3 en 4 Oktober. In die ander maande is daar in elk geval langnaweke, vakansies en bloktye. Die SSR-lid vir publikasies moet vir uitsonderings op dié reëls genader word. (Hierdie is 'n besluit van die ou SSR).

**Teoreties is hierdie 'n baie goeie reëling, maar 'n mens wonder of dit altyd so prakties uitvoerbaar**

gaan wees. Sportburo het reeds aangedui dat dit baie moeilik gaan wees om by dié reëling in te skakel.

Die lys van die SSR-indeling by die koshuise is bekendgemaak: Anton Fick — Amajuba en Oppikant, Joggie van Staden — Caput, Nico Lemmer — Kulu en Klooster, Fielies Kotze — Dinki en Villagers, Willem Fourie — Heide, Piet Fourie — Hombré, Corné Mulder — Karlien, Fanie Venter — Kasteel, Jan van der Walt — Klawerhof, Lappies Labuschagne — Makoulei en Liberalia, Wim Vergeer — Oosterhof, Mario Smith — Over de Voor, Awie Verhoef — Heimaton Uitspan, Reinder Kingma — Vergeet-my-nie, Jurie van der Walt — Wag-'n-bietjie, en Fanie Haasbroek — Wanda.

In die verlede het daar van kos-

huisbesoeke deur SSR-lede nie veel tereg gekom nie. Ons vertrou dat die nuwe SSR hierdie wyse van kontak met die studente sal aangryp en dit na die beste van hulle vermoë benut.

Daar word Woensdag 'n gesamentlike vergadering van die PU se SSR en die SR van die Vaalrivier-tak gehou. Sake soos vergoeding van die SR, die hele SR-opset, portefeulje-indeling, kontak vir die res van die jaar en ander sake van gemeenskaplike belang sal onder die soeklig kom.

Dit is verblydend om te sien dat daar kontak is tussen ons SSR en die SR van die Vaal-Pukke. Ons vertrou dat hierdie bande sal groei en iets positiefs sal bydra tot die studentelewe van beide kampusse. — H.V.





# PUKKIE-LAND



## Kafeteria lewer nou groter diens

DIE kafeteria by die studentesentrum het vandeeweek met nog een van hulle proefnemings begin.

'n Swartman verkoop elke dag lekkergoed en sigarette by die kantore in die administrasiegebou. Dit gee nou aan die personeel 'n kans om versnaperinge te koop sonder om die kantore te verlaat.

Mnr Momborg, die bestuurder van die kafeteria, het gesê dat hulle beoog om die stelsel verder uit te brei na die koshuise. Die uitbreiding sal egter eers geskied as hulle seker is dat die proefneming geslaagd is.

## RAU dink oor biertuin

OP ander universiteite word die wenslikheid van 'n biertuin tydens alle funksies en aangeleenthede ook heroorweeg.

Die biertent by RAU se jool hierdie jaar, is skerp deur die SR gekritiseer. Veral die dames se gedrag het die SR se vertroue geskok. Die jooltent was walglik en onhygiënies en daar is ook kaspie gemaak teen die "vieslike vuil taal".

Daar bestaan 'n moontlikheid dat hierdie "moet" by die meeste feeste dalk sy laaste jaar op die RAU-kampus gehad het. Die moontlikheid van 'n koëffient as alternatief word ondersoek. (Die Perdeby, 12 September '80)

# JONGMENSE DINK VANDAG ANDERS OOR BANKE.

## HIER'S 'N BANK WAT ANDERS DINK OOR JONGMENSE.



Kom ons praat reguit. As nugtere bankmense wat maar altyd sekuriteitsbewus is, het ons vaagweg aan die jeug gedink as die leiers van môre.

Maar dit het verander. Want die jeug het verander... altans, die Suid-Afrikaanse jeug.

Ons jongmense het die uitdaging van 'n vyandige wêreld aanvaar en hulle is die mense wat op haas elke terrein die boonste sport bereik.

Op die sportveld, op akademiese gebied, die handel, in die vervaardigingswêreld, op landbougebied... maar bowenal op die grens waar ons land en sy mense verdedig word.

Ons by Volkskas glo dat ons moet luister na die probleem van enige jongmens wat by ons instap.

Ons weet vandag se jeug is môre se leiers en ons wil ons deel doen om hulle daar te kry — kom bespreek u geldprobleme met ons.


**BANK SUID-AFRIKAANS**

**Volkskas**



(Gereguleerde Handelsbank)  
KMP 64517a

Prims 1980



● Bert Sorgdrager, primarius van Villagers vir 1981. Hy was gedurende 1978 ook op die HK, 1979 primarius en in 1980 was hy op die SSR. Bert is tans besig met LLB I en beplan om volgendejaar aan te gaan met LLB II.



● Louise Venter, primaria van Klaverhof vir 1981. Sy was hoofmeisie van Hugenote Hoërskool op Springs en het daar op die junior Stadsraad gedien. Louise doen vanjaar BA III en wil volgende jaar haar HOD doen.



● Oppikant se primarius vir 1981 is Barend Kirsten. Hy was ook gedurende 1980 primarius van Oppikant. Barend voltooi hierdie jaar B. Juris III.





● Lede van die Suid-Afrikaanse Instituut vir Biblioteek- en Inligtingswese verkeer hier in 'n gesellige luim tydens 'n kaas-en-wynfunksie ná afloop van die algemene jaarvergadering.



● Monika Krampitz, Orna Kemp en David Swanepoel, lede van die ou en nuwe bestuur van die Studente Biblioteekvereniging tydens 'n funksie na afloop van die vergadering van die Suid-Afrikaanse Instituut vir Biblioteek- en Inligtingswese.



● 'n Gewese primarius van Heimat, Eric Coetzee en sy metgesel, Dorothea Visser van Kulu verskyn hier saam met die huidige primarius, Deon Lartz en sy metgesel, Marie de Bruin van Karlien tydens Heimat se dinee.



● Die Hombré-manne van gang ses en die "Penniless" dames van Wag-'n-Bietjie in gesellige luim tydens 'n kaas-en-wyn-aksie. Van links is Attie Steyn, Annatjie Cloete, Heinrich Brand, Piet Burgers, Anton Dicks en Anjoma Jordaan.



● Op Saterdag 13 September, het die oud inwoners van die afgelope tien jaar van Heide reünie gehou. Die middag is die oud inwoners in die sitkamer verwelkom en daarna is hulle deur mnr Johan Aucamp op 'n kort besigtigingstoer geneem. Die aand is met 'n skemerkelkie en 'n vingerete afgesluit, waarna almal na Alabama gaan luister het. Hier verskyn die primariae van die afgelope agt jaar. Agter van links na regs is Karen van Wyk (Schellnus) 1978, Alvirra Ferreira (Marx) 1973, en Gertruida Malan 1977. Voor van links na regs is Almarien Smith (Vorster) 1972, Chrisel Azar (Von Weilligh) 1974, Mara Kriel 1979 en Christien Fourie 1980.

## Oulike koppies vir sleeptyd



en te le ander aardigheidjies om 'n eerstejaar se kamer interessant te maak. Rakke vol van die oulikste goed om 'n dierbare maat se hart bly te maak. Net langs die INSLEEP-KAFEE.

**Insleep** -geskenkwinkel  
Gift Shop  
TOMSTRAAT 100 TELEFOON 2-1033

## Regsstudente hou makietie

VERLEDE Vrydagaand is makiete gehou toe die regstudente van die PU hul jaarlikse afskeidsdinee in die Oribi-restaurant gehad het.

Daar is op 'n gesellige wyse afskeid geneem van die finale jaar LLB- en B.Proc-studente.

Advokaat Johan Kriegler, senior advokaat van die Johannesburgse balie, het as gasspreker by die geleentheid opgetree. Advokaat Kriegler het menseregte toegelig en gewys op die verantwoordelikheid van die juris — veral in die praktyk. Volgens hom moet die juris dikwels bereid wees om "ongewilde dinge te sê en te doen".

Mnr Josef Krüger het ook by die geleentheid 'n foto van die finale jaar-

studente aan prof Scott, adjunk-dekaan van die Regsfakulteit, oorhandig.


Die aand is verder gesellig deurgebring op 'n wyse eie aan die Regsfakulteit...

## Kultuurraad vergaderings

DIE Kultuurraad het die tye van hul vergaderings uitgestip.

Hulle hou elke Maandag om 13h15 'n Dagbestuur-vergadering.

Daar word ook beoog om elke eerste Dinsdagaand van die maand 'n volle Kultuurraads-vergadering te hou. Daar moet asseblief kennis geneem word van hierdie reëling.



● Junel van Lingen van die Stellenbosch-Boerewynmakery, het deur die loop van verlede week koshuise toegesprek en hulle verskeidenheid produkte bekend gestel. Die dames is onderrig in die doeltreffende wynproe-metodes. Wynproeterme val natuurlikerwys in vier hoofkategorieë, naamlik voorkoms, kleur, reuk en smaak. Droë witwyn is die lekkerste saam met vis en pluimvee, droë rooi met die swaarder vleise en soet witwyn met nagereg.

## guys & dolls

vat dit kop toe!



Kom ons stel jou voor aan 'n nuwe dimensie in haargolwing: UNI-PERM met pH-balans! Dit lyk nes natuurlike krulle! Geen kroes-en-knoop bossiekop nie! Nog goeie nuus van Guys & Dolls is lae, lae pryse net vir studente! Wees 'n IN-ding! Bly voor met die jongste haarmodes! Altyd tot u vriendelike diens! Die uwe,

GUYS & DOLLS, Tomstr. 82, tel. 8071.





## Atletiek: Koshuisliga uitslae

AL drie koshuisliga's is afgehandel en baie goeie prestasies is gelewer, veral vir dié tyd van die seisoen. Die liga's wat begin is met swak bywoning van toeskouers en atlete, het teen die laaste liga eers vlam gevat. Die finale puntestand van koshuise is:

400 m hekkies: J.v.d. Walt Caput 54,44 sek.  
100 m: C. Botha Over de Voor 10,9 sek.  
1 500 m: S Greyling Over de Voor 4 min 0,2 sek.  
400 m: G Grey Amajuba 50,39 sek.  
400 m: F Kotze Drakenstein 50,4 sek.

Dames Hoogspring: N Barnard Oosterhof 1,66 m  
Skyfwerp: S d Villiers Karlien 42,19 m  
Verspring: I Campher Dinki 6,92 m  
400 m hekkies: L Smit Oosterhof 62,5 sek.  
110 m: P Fourie Oosterhof 12,1 sek.  
1 500 m: M Buys Karlien 5 min 04,5 sek.  
400 m: P Fourie Oosterhof 55,7 sek.

MANS:	DAMES:	
1. Over de Voor	1. Oosterhof	940
2. Amajuba	2. Dinki	795
3. Caput	3. Karlien	625
4. Hombre	4. Heide	610
5. Dawie du Plessis	5. Wanda	515
6. Drakenstein	6. Kasteel	335
7. Klooster	7. Wag 'n bietjie	225
8. Villagers	8. Klawerhof	110
	9. Vergeet my nie	60

Die uitslae van die C-liga is:  
Mans Hoogspring: D Marx Hombre 1,90 m  
Skyfwerp: P Goosen Oppikant 53,40 m  
Verspring: C Botha Over de Voor 6,89 m

## Kortsport

### Krieket

Gedurende 'n vriendskaplike wedstryd tussen die PU en Oostelikes op 19 en 20 September, het die PU gewen. Die wedstryd het op die Fanie du Toit-sportterrein plaasgevind. Die tuisspan het 157 lopies vir 3 paaltjies gekry. Oostelikes was almal uit vir 155 lopies. Hulle het eerste gekolf.

Paul van Heerden het die meeste lopies aange-teken. Hy het 69 van die 157 lopies van die PU-span aangeteken. Die beste boulwerk is deur Pieter de Haas gedoen, hy het 3 paaltjies vir 65 lopies laat kantel. Oor die algemeen was die boulwerk van hoogstaande gehalte.

Die Wes-Transvaalse liga's begin 27 September en drie PU-spanne is ingeskryf.

### Muurbal

Die PU ope-muurbal-kampioenskappe is afgehandel en die uitslae is soos volg:

Die damesafdeling is gewen deur Louise le Roux en Anet Theron is die naaswenner. Ronel Berg het die derde plek beklee en Maretha Delpport was vierde.

Die mansafdeling is gewen deur Johan Schoeman. Eddy Schoch het die tweede plek beklee. Jan Theunissen en Jim van Zyl was albei derde.

### Sportafrigters

Alle sportafrigters moet op 13 Oktober of 15 Oktober om 15h00 by die senaatsaal opdaag om vraelyste in te vul! Dins-

# Koshuisrugby raak "Sharp" met nuwe borg

KOSHUISRUGBY het verlede week 'n inspuiting gekry deur Sharp Electronics wat R3 000 aan koshuisrugby geskenk het. Die geld sal uitsluitlik vir die verbetering van koshuisrugby gebruik word.

Sharp Electronics het verlede jaar begin om koshuisrugby te borg. Die Universiteit van Stellenbosch, Universiteit van Pretoria en Universiteit van Oranje Vrystaat het reeds verlede jaar elkeen 'n borg van R3 000 ontvang. Vanjaar word behalwe bogenoemde universiteite, ook die Randse Afrikaanse Universiteit, Universiteit van Kaapstad en onself geborg.

Die doel van die borgskap is om koshuisrugby te verbeter, omdat dit die basis van Suid-Afrikaanse rugby is. Sharp Electronics het verskeie sportsoorte oorweeg om te borg, maar het op koshuisrugby besluit. Hulle meen dat dit die beste manier is om iets in die gemeenskap terug te ploeg, want dit is juis die mense wat die maatskappy steun.

Volgende jaar gaan 'n nasionale koshuisrugbyreeks gehou word. Die wenners van die verskillende universiteite se koshuisliga's, sal in die reeks teen mekaar speel om die wenner van die beste koshuisrugbyspan in die land aan te wys. Die onkoste sal ook op 'n rand-vir-rand basis deur Sharp Electronics gedek word.

Caput, wat vanjaar se koshuisliga gewen het, het die Sharp-skild verlede Maandagaand ontvang. Mnr Colly Fran, voorsitter van Sharp Electronics het die skild aan Jannie van Heerden, Caput se kaptein, oorhandig. Mnr Fran

en ses verteenwoordigers van sy maatskappy het die eindstryd tussen Caput en Over de Voor bygewoon. Hulle was baie beïndruk met die gehalte van die spel en ook deur die aantal toeskouers wat die wedstryd bygewoon het. Om sy welwillendheid

teenoor die PU verder te wys, het hy 'n bykomende R3 000 geskenk. Mnr Fran het ook te kenne gegee dat hulle bereid is om 'n telbord op die Fanie du Toit-sportterrein te borg.

Mnr Dirk de Vos, afrigter van die PU se eerste span, het dieselfde aand

gesê dat die wenners van die koshuisrugbyliga van die Universiteit van Pretoria, ons wenners uitgedaag het. Die wedstryd sal Maandag 29 September om 16h30 op die Fanie du Toit-sportterrein plaasvind. Dit sal die hoogtepunt van die Lentedag wees.



● Mnr Colly Fran en prof Tjaart van der Walt oorhandig die Sharp-skild aan Caput se rugbykaptein, Jannie van Heerden, en Percy du Toit tydens die onthaal waar Sharp Electronics R3 000 aan koshuisrugby oorhandig het. 'n Verdere R3 000 is aan die universiteit oorhandig om die maatskappy se welwillendheid teenoor die PU te toon.

## Caput wen die oorkoepelende liga

SAAMBOU NASIONAAL bied jaarliks 'n Sportprys vir die wenners van die oorkoepelende koshuisliga's aan. Sestien sportklubs het koshuisliga's aangebied en die finale puntestand van die koshuise is soos volg:

MANS:		
1. Caput	158	7. Kulu
2. Over de Voor	110	8. Heide
3. Villagers	88	9. Oosterhof
4. Hombre	78	
5. Klooster	74	
6. Dawie du Plessis	60	
7. Drakenstein	48	
8. Amajuba	40	

Die prys van R750 wat deur Saambou Nasionaal geskenk is, word soos volg verdeel:

DAMES:		MANS:
1. Vergeet my nie	82	1. Caput R175
2. Karlien	68	2. Over de Voor R125
3. Wanda	62	3. Villagers R75
4. Dinki	54	
5. Klawerhof	46	
6. Wag 'n bietjie	38	
6. Kasteel	38	

DAMES:  
1. Vergeet my nie R175  
2. Karlien R125  
3. Wanda R75

## Judo

LEDE van PU-judoklub het in die afgelope Wes-Transvaalse proewe besonder goed gevaar. Die volgende lede is gekies om van 9 tot 12 Oktober aan die Suid-Afrikaanse kampioenskappe deel te neem:

JUNIORS: A Raadts; J Raadts; H Brits.  
SENIORS: Huibrecht Kriel; Charl Botes; Thys Storm; T Papararnoroa.

Van die groot geeste in die span is Ronel Campher (Springbok) ontvanger van 'n ere-Staatspresidents-toekenning. Vir Hugo Pienaar, B Boshoff en Charl Botes, aldrie Junior Springbokke, lê daar sterk kompetisie voor. Hulle mededingers het onder andere kursusse in Japan en Wes-Duitsland deurloop.

## Aikido verdien nuwe gordels

DIE Aikidoklub het Saterdag, 13 September, sy tweede gradering vir die jaar gehad. Die hoofstruktuur van die nasionale Aikido-liggaam in Suid-Afrika het dit waargeneem en die Pukke het weer baie geleer. Die standaard van die klub was weereens baie hoog, alhoewel dit nie weer die peil van ons vorige gradering dié jaar kon bereik nie. Daar was egter baie beginners wat vir die eerste keer hulle staal kon wys en die toekoms kan nog baie hoogtepunte oplewer.

Daar was altesaam sestien persone wat nuwe gordels

verdien het, waaronder vyf dames was. Vir die eerste keer in die Aikidoklub se geskiedenis het 'n dame die hoogste punte van die dag behaal. Hanlie van Niekerk spog met 'n gemiddeld van 78%. Die huidige klubkampioen, Annes Anrendale, het sy titel behou deurdat hy die klublid was wat die hoogste gemiddeld gedurende die jaar gehandhaaf het. Hy is ook die leerling met die hoogste gordel in die klub.

Die finale uitslag was dat daar nege geel gordels toegeken is, ses oranje gordels en een groen gordel. Die sestien kandidate wat geslaag het, is die meeste wat nog deur die Aikidoklub op een gradering behaal is.